

ТУЫНДЫ СӨЗДЕР



5-сынып, қазақ тілі

Сөзжасамға кіріспе



Тілдің дамуы, жаңа сөздермен толығыуы тек кірме сөздерге ғана байланысты емес. Сөздік құрамның баюына сөзжасам саласы да зор үлесін қосу үстінде. **Сөзжасам** – жаңа сөздердің жасалуы. Зерттеу нысаны – **туынды сөз**, яғни туынды сөздердің жасалуы, құрамы және басқа да мәселелерді қарастырады. Мысалы, **кәсіп** сөзіне **-кер** қосымшасы жалғануы арқылы кәсіпкер сөзі туындап тұр. Кәсіп дегеніміз белгілі бір еңбек түрімен айналысу десек, кәсіпкер деген сол кәсіп түрімен айналысатын адамды айтамыз. Күрек – жерді қазуға, күреуге арналған шаруашылық құралы болса, **күре** – қазу, ысыру, жинау мағыналарын білдіреді. Сонда іс-әрекеттің атауына **-к** қосымшасын жалғау арқылы құралдың атауын білдіретін жаңа сөз туындады. Ал үшбұрыш сөзі үш және бұрыш деген екі толық мағыналы сөздердің бірігуінен жасалған. Мағынасы **үш** түзу сызықтың бір-бірімен шектесіп, **бұрыш** құрауынан пайда болған фигураның атауы.

Сөзжасамдық тәсілдер:

Атауы:	Синтетикалық тәсіл	Аналитикалық тәсіл	Лексико-семантикалық тәсіл
Анықтамасы:	түбірге сөз тудырушы жұрнақтардың жалғануы арқылы екінші мағынаның туындауы.	негіздердің бірігуі, тіркесуі, қосарлануы арқылы ерекше мағыналы атау жасау қабілеті.	белгілі бір сөздің жаңа мағынаға ие болуы арқылы жаңа сөздің жасалу жолы. Тілдегі бұрын қолданылып жүрген сөздің жаңа мағына қосып алуы.
Мысалы:	балық+шы, дос+тық, сен+ім, бір+лік	темір+жол, ақ+көңіл, қол+жазба, алты+бақан	Айтыс, екпін, кеңес, жаз
Есте сақта!	Түбір және сөз тудырушы жұрнақ	Біріккен сөздер, тіркескен сөздер, қос сөздер, қысқарған сөздер	Көп мағыналы және омоним сөздер



Сөзжасамның синтетикалық тәсілі

Синтетикалық сөзжасамдық тәсіл – жаңа сөз жасаудағы негізгі тәсіл. Синтетикалық тәсіл арқылы туынды сөз жасауда екі бірлік қызмет атқарады: мағыналы сөз және сөз тудырушы жұрнақ.

Мысалы, **жаңалық, сезім, тәртіпті, етікші** сөздерінің түбірі жаңа, сез, тәртіп, етік сөздері. Ал **-лық, -ім, -ті, -ші** – бұлар сөз тудырушы жұрнақтар.

Туынды сөз бен туынды сөздің жасалуына негіз болған түбір сөздің арасында міндетті түрде мағыналық байланыс болатындықтан, туынды сөздің түбірін ажырату оңай болады. Мысалы, білімпаз сөзі біл етістігінен туындаған. **“Біл”** – түбірі, **“-ім”** – етістіктен зат есім тудырушы жұрнақ, **“-паз”** – зат есімнен сын есім тудырушы жұрнақ.

Біл – бастапқы мағынаны білдіретін түбір сөз:

Білім – заттық ұғымда тұрған туынды түбір:

Білімпаз – ұғымның сынын білдіретін туынды сөз.



Сөзжасамның аналитикалық тәсілі

Аналитикалық тәсіл дегеніміз – екі я одан да көп сөзден (сөздердің бірігуі, қосарлануы, тіркесуі арқылы) бір лексикалық мағыналы сөздің жасалуы.

Мысалы: Көкшетау, Дәрі-дәрмек, Алма шырыны, ҚР ҰҒА, ақбөкен(зат есімдер); қап-қатты, тап-таза, қара көк, сары ала, қою қалың қара(сын есімдер); қырық сегіз, он алты, екі жүз(сан есімдер); кіріп шық, алып кел, алып бар (етістіктер); күні кеше, күндерде бір күн, биыл (үстеулер); тақ-тұқ, жалт-жұлт (еліктеуіштер); пай-пай, ойпырмай, бәрекелді (одағайлар).

Аналитикалық тәсіл арқылы жасалған туынды сөздер **күрделі сөздер** деп аталады. Күрделі сөздер толық мағыналы сөздерден жасалады.

Қазақ тілінде аналитикалық тәсілдің бірнеше түрі бар:

1) бірігу: 2) қосарлау: 3) тіркестіру.



Сөзжасамның лексико-семантикалық тәсілі

Лексика-семантикалық тәсіл арқылы сөздің жаңа мағынаға көшуіне байланысты сөз бір сөз табынан екінші сөз табына ауысады. Лексика-семантикалық тәсілде сөз ешбір тілдік бірліктің көмегінсіз, дыбыстық құрамын сақтай отырып, мағынасы өзгеріп, басқа сөз табына көшеді.

Кеңес сөзінің бірнеше мағынасы

1. **Ақылдасу, пікірлесу.** Бұлар өзара кеңесіп отырды.

2. **Жиналыс, мәжіліс.** Ауданда үлкен кеңес ашылмақ.

3. **Саяси ұйым.** Кеңес үкіметі орнап, кедейдің көзі ашылып-ақ қалып еді.

өзіңе сен, өзіңді алып шығар,
Еңбегің мен ақылың екі жақтап.



Сөз тұлғасы

✓ Сөзді әртүрлі бөлшектерге бөліп қарастыруға болады. Әр бөлшектің өзіне лайықты атауы, мағынасы және қызметі болады. Мысалы: сурет-ші-лер-ді. **Сурет** – түбірі, **-ші** – зат есім тудырушы жұрнақ, **-лер** – көптік жалғау, **-ді** – табыс септігінің жалғауы. Сөйтіп, сөздің тұлғасы деген ұғымға түбір және қосымша деп аталатын бөлшектер кіреді.

Сөз жалғыз бір түбірден де (мысалы: бала, дос, сары, т.б.), қосымшалы түбірден де (мысалы: сән-қой, әдіс-кер, тіре-к, т.б.), екі түбірден де (мысалы: азды-көпті, өнеркәсіп, тотықұс, бала-шаға, ауыл-аймақ, т.б.) құралады.

Түбір мен қосымша

Түбір – сөздің одан әрі бөлшектеуге келмейтін бөлігі. Сөздің негізгі мағынасы түбірде сақталады. Мысалы: үй, әке, сары, дала, көр, өзен. Бұл сөздердің ешқайсысы әрі қарай бөлшектенбейді.

Қосымша – түбірге жалғанатын мағынасыз бөлік. Негізгі қызметі: сөз бен сөзді байланыстыру.

Қосымшаны 2-ге жіктейміз:

Жұрнақ	Жалғау
Түбірге жалғанып, жаңа сөз жасайды, өзі жалғанған сөздің мағынасын өзгертеді, ол сөзді басқа сөзбен байланыстырмайды.	Жалғау сөзге жалғанып, сөз бен сөзді байланыстырады, жаңа сөз жасауға қабілеті жоқ.
2 түрі бар: Сөз тудырушы жұрнақ Сөз түрлендіруші жұрнақ	4 түрі бар: Көптік жалғау Жіктік жалғау Септік жалғау Тәуелдік жалғау
∧	┌

Жұрнақ



Өзі жалғанған сөздің мағынасын өзгертетін және түрлендіретін қосымша **жұрнақ** деп аталады.



Өзі жалғанған сөздің мағынасын толық өзгертіп, жаңа мағына тудыратын жұрнақ **сөз тудырушы жұрнақ** деп аталады.

Талғам+паз (түбірі - зат есім, туындаған сөз - сын есім)
Тара+қ (түбірі-етістік, туынды - зат есім)
Тіс+те (түбірі-зат есім, туынды - етістік)
Ег+іс+тік (түбірі-етістік, туынды түбірі-зат есім, туынды- зат есім)

Жоғарыдағы мысалдарда түбір мен туынды сөздің айырмашылығы бар, жаңа сөз туындап тұр. **Талғам** деп (адамның нәселерді ажырата алуы) қабілетті айтып тұр. Ал –**паз** жұрнағы жалғанған соң, **талғампаз** деп заттардың белгідерін ажырата алатын адамды айтады.



Сөз түрлендіруші жұрнақ - өзі жалғанған сөздің мағынасын толық өзгертпей, түбірге жалғанып, сөзді тек түрлендіріп, қосымша мән үстейді.

Жапырақ+ша (Жапырақ-үлкен түрі, жапырақша-кішкентай)
Көл+шік (көл-үлкен, көлшік - кішкене түрі)
Апа+тай (апатай-еркелету мәнінде айтылып тұр)
Жібек+жан (Жібек пен Жібекжан арасында еш айырмашылық жоқ)
Құлын+шақ (құлын мен құлыншақ - екеуі де жылқының төліне айтылады)

Жоғарыдағы мысалдарда екі сөзде де бастапқы мағына өзгерген жоқ, тек олардың рең мәні ауысты. **Жапырақ** деп ағашта толық өсіп шыққан түрін айтсақ, **жапырақша** деп әлі толық өсіп болмағанын айтамыз. Екеуінің арасында қатты айырмашылық жоқ. Тек көлемінде ғана айырмашылық бар.



Туынды сөз – жұрнақ арқылы жасалған жаңа сөздер. Туынды сөз негізгі түбірден де, туынды түбірден де жасала береді. Көр+ме, сынып+тас - негізгі түбірден; (Бұл жерде «көр, сынып» сөздері нақты түбір сөздер) егін+ші, көрік+ті – туынды түбірден. (Бұл жерде «егін, көрік» нақты түбір емес, нақты түбірлері «ек, көр». Сондықтан да бұл сөз туынды түбірден жасалған туынды сөз)

Түбірлес сөздер – бір түбірден жасалған әртүрлі сөздер.

Мысалы:

- Жаз, жазу, жазба, жазушы.
- Біл, білім, білгір, білімпаз, білгіш, білімді.
- Ас, аспаз, астық, астау.

Жалғау



Сөз бен сөзді байланыстыратын қосымша **жалғау** деп аталады.



Жіктік жалғауы баяндауышқа жалғанып, оны бастауышпен жақ-жағынан қиыстырып тұрады. Жіктеу етістікке тән және адамға қатысты зат есімдер жіктеледі. Мысалы: *мен қазақтың баласы+мын*. Ал қала, дала, бақша, өзен, көл, дәптер, тақта т.б. зат есімдер жіктелмейді. **Тек адамға қатысты зат есімдер ғана жіктеледі.**

Жекеше	Көпше
Мен жүземін, оқушымын.	Біз жүземіз, оқушымыз
Сен жүресің, оқушысың Сіз жүресіз, оқушысыз	Сендер жүресіңдер, оқушысыңдар Сіздер жүресіздер, оқушысыздар
Ол жүзеді, оқушы	Олар жүзеді, оқушы



Септік жалғаулары – зат пен зат, зат пен қимыл арасындағы түрлі қатынастарды білдіріп, сөз бен сөзді байланыстыратын қосымшалар. Қазақ тілінде жеті септік жалғауы бар: **атау, ілік, барыс, табыс, жатыс, шығыс, көмектес** септіктері.

Атауы	Сұрағы	Мысалы
Атау	кім?не?	Асқар жүгірді, сурет ілінді
Ілік	кімнің?ненің?	Алуаның кітабы, ыдыстың сынығы
Барыс	кімге?неге?қайда?	әкесіне қарады, мектепке барды,
Табыс	кімді?нені?	суретті көрді, інісін кездестірді
Жатыс	кіммен?немен?	тауда өседі, күзде жауады,
Шығыс	кімнен?неден?қайдан?	үйден шықты, шашынан ұстады
Көмектес	кіммен?немен?	балтамен шапты, сөзбен жеңді

Жалғау



Сөз бен сөзді байланыстыратын қосымша **жалғау** деп аталады.

3

Заттың көп екенін және сол заттың көпке ортақ екенін білдіру үшін заттың атын білдіретін сөздерге **көптік жалғау** жалғаймыз. **-лар, -лер, -дар, -дер, -тар, -тер** түбірге жалғанып, заттың бірнешеу екенін білдіреді.

- Жалқы есімдерге жалғанып, жинақтау, топтау мағынасын білдіреді. Мысалы: Омарлар қонаққа кетті.
- Сан есімге жалғанып, болжалдық мағынаны білдіреді. Мысалы: Оның жасы отыздарда. Екілерге қарата кел.

ҚАЗАҚ ТІЛІНДЕ КЕЙБІР СӨЗДЕРГЕ КӨПТІК ЖАЛҒАУЫ ЖАЛҒАНБАЙДЫ:

Сан есіммен тіркескен сөздер	10 оқушы (10 оқушылар емес), 30 қой (30 қойлар емес)
Жер-су атаулары	Атлант мұхиты, Қызылорда, Батыс Қазақстан
Сұйық заттардың атаулары	айран, шай, тұздық
Газ тектес заттардың аттары	азон, бу, түтін, тұман
Уақ, ұнтақ заттардың, үгітінді заттардың атаулары	ұн, шаң, тозаң, жусан, жүн, түбіт, шаш, кірпік
Дерексіз ұғымдарды білдіретін заттардың атаулары	айла, ақыл, қайғы, қасірет, сүйеніш
Жаратылыс құбылыстарының атаулары	боран, жаңбыр, жел, құйын


4

Тәуелдік жалғауы заттың біреуге немесе бір затқа тәуелді (меншікті) екенін білдіреді.

Оңаша тәуелдену	Ортақ тәуелдену
Менің сыныбым, сусыным	Біздің сыныбымыз, сусынымыз
Сенің сыныбың, сусының Сіздің сыныбыңыз, сусыныңыз	Сендердің сыныптарың, сусындарың Сіздердің сыныптарыңыз, сусындарыңыз
Оның сыныбы, сусыны	Олардың сыныптары, сусындары

Тәуелдік жалғаулы сөз ілік септік жалғаулы сөзбен байланысып тұрады. Мысалы: қазақтың жері, кітаптың беті, ағаштың жапырағы, сиырдың сүті.

Жас мұраты, білім, тәлім – талабы...
Өнер, оқу – жастықтың қару жарағы.



Сөз құрамы



Сөздер құрамы жағынан **дара** және **күрделі** болып 2-ге бөлінеді.

Дара сөздер	Күрделі сөздер
Бір ғана түбірден тұратын негізгі және туынды сөздер.	Кемінде екі түбірден жасалып, бір мағынаны білдіретін сөздер.
1. Түбір сөз - сөздің мағынасы бар ең бастапқы бөлшегі. Мыс: ән, дос, бөл, тау, жақсы, біл 2. Туынды сөз - түбірге жұрнақ жалғану арқылы жасалады. Мыс: әнші, достық, бөлім, таулы, жақсылық, білгір	Күрделі сөздер 4 түрлі жолмен жасалады: 1. Біріккен сөз (тас +бақа, өнерткәсіп) 2. Қос сөз (некен-саяқ, ауыл-аймақ) 3. Тіркескен сөз (сөз табы, он жеті) 4. Қысқарған сөз (ұжымшар, ҰБТ)

Күрделі сөздер



Біріккен сөздер - екі немесе одан да көп сөз бірігіп, бір ұғымды білдіретін және бір сұраққа жауап беретін сөздер. Мысалы: *алабота, белбеу, ашудас, шаңсорғыш, тасбақа, кемпірқосақ, бәйтерек, Қызылорда, баспасөз*

1) аң, құс, жәндік, өсімдік атаулары:	қосаяқ, тасбақа, егеуқұйрық, жолбарыс
2) географиялық атаулар (жер, су, планета аттары):	Жетіқарақшы, Темірқазық, Ақбозат, Көкбозат
3) кісі аттары:	Орынбасар, Сейілбек, Мұхаметжан, Ерасыл
4) дене мүшелері (анатомиялық атаулар):	асқазан, тоқішек, ұлтабар, сегізкөз
5) ауру атаулары:	алаөкпе, көкжөтел, қылтамақ
6) ойын атаулары:	алтыбақан, ақсүйек, балтаптап, доптаяқ
7) ән, күй, өлең аттары:	Сарыжайлау, Сарыарқа, Қараторғай, Сегізаяқ
8) қоғамдық өмірге, күнделікті тұрмысқа байланысты әртүрлі атаулар:	баспасөз, қолбасшы, кәсіпорын, отағасы
9) белгісіздік, болымсыздық мәндегі атаулар:	ешкім, ештеңе, қайсыбіреу, әлдекім

Кіріккен сөздер - құрамындағы сөздердің ең кемінде бір дыбысы өзгеріп біріккен сөз.

Бүгін - бұл+күн

Түрегелді - тұра+келді

Биыл - бұл+жыл

Білезік - білек+жүзік

Сөйтіп - солай+істен

Қарлығаш - қара+ала+құс

Күрделі сөздер

2 **Қос сөздер** – сөздердің қосарланып немесе қайталанып айтылуынан жасалған, дефия арқылы жазылатын сөздер. Мысалы: тау-тау, көре-көре, ата-ана, ыдыс-аяқ, досжараң, киім-кешек, некен-саяқ, ығы-жығы, оқу-әдістемелік

Қос сөз **қосарлама қос сөздер** және **қайталама қос сөздер** деп 2-ге бөлінеді.

Қайталама қос сөз – бір түбірдің екі рет қайталануынан жасалған қос сөздер	Қосарлама қос сөз – екі түбірден қосарланып жасалған қос сөзді қосарлама қос сөз дейді.
1) қосымшасыз және қосымшалы түбірдің түгелдей қайталануы: тау-тау астық, үйдей-үйдей боп жатыр	1) Мағынасы бір-біріне жақын (синоним) я қарама-қайшы (антоним) сөздер қосарланады: аға-іні, үлкен-кіші
2) бір сыңары қосымшалы, бір сыңары қосымшасыз бір түбірдің қайталануы: көзбе-көз айтты, ауыл-ауылды аралады	2) Бір сыңары мағыналы, екінші сыңары мағынасыз сөздер қосарланады: бала-шаға, жүн-жұрқа
3) бір түбірдің әртүрлі қосымша жалғанып қайталануы: өзді-өзіне айтты, қолды-қолымен кетті	3) Екі сыңары да мағынасыз сөздер қосарланады: ығы-жығы, оқта-текте
4) екінші сыңары бірінші сыңарына еліктеу мәнінде келіп, дауыссыз дыбыстан басталатын сөздің бірінші дауыссыз дыбысының орнына және дауысты дыбыстан басталатын сөздің алдына м, п дыбыстары қосылып жасалуы: ет- мет, шай-пай	4. Кейінгі кезде ғана қалыптаса бастаған бір топ қосарланған сөздер бар: үгіт-насихат бөлімі, оқу-ағарту саласы
5) еліктеуіш сөздің екінші сыңары кейбір дыбыстық өзгерістерге ұшырап қайталануы: тарс-тұрс дыбыс шықты, салт-жұлт етті	
6) түбір сөздің алдынан күшейткіш буын қосылып айтылуы: үп-үлкен, қып-қызыл	

Күрделі сөздер

3

Екі я одан да көп сөздер тіркесіп келіп, бір ұғымды білдіретін күрделі сөздер **тіркесті сөздер** деп аталады. Бұлар мағынасы жағынан біріккен сөздер сияқты бір ұғымның атауы болып келеді, бірақ бір-бірінен бөлек жазылады. Мысалы: сөз таптары, қара торы, үш жүз, күні бойы

Зат есім	Алматы қаласы, ауыл шаруашылығы
Сан есім	Ат жақты, ұзын бойлы, бидай өңді
Сын есім	Он тоғыз, тоқсан алты, мың алты жүз алпыс бес
Үстеу	Күні бойы, ертеден қара кешке дейін

4

Кейбір күрделі атаулар, мемлекет, мекеме, ұйым аттары бірнеше сөздің тіркестерінен құралып, кейде қысқартылып та қолданыла береді. Мысалы: Машина-трактор станциясы деген МТС болып, Америка Құрама Штаттары деген АҚШ болып, Біріккен Ұлттар Ұйымы деген БҰҰ болып қысқартылады. Осындай күрделі атаулардың белгілі тәсілдермен қысқартылып алуын **қысқарған сөздер** дейді.

1) күрделі атау құрамындағы сөздердің бас әріптерінен құралады:	БҰҰ – Біріккен Ұлттар Ұйымы
2) күрделі атау құрамындағы бірінші сөздің басқы буыны мен кейінгі сөздердің бас әріптерінен құралады:	ҚазМИ – Қазақстан медицина институты
3) күрделі атаулардың құрамындағы сөздердің бірінші буындарынан немесе бірінші сөздің басқы буыны мен келесі сөз тұтас қалпында бірігіп құралады. Мұндай қысқарған сөздер кіші әріппен және оған қосымша дефиссіз қосылып жазылады:	педколледжге (педагогтік колледжге) түсті, аткомге (атқару комитетіне) барды.
4) ГАЗ-51, ТК-154, ИЛ-86, АН-24 тәрізді техника түрлерінің (ұшақ, машина, трактор, т. б.) маркаларын көрсету үшін алынған шартты белгілер де қысқарған сөздер болып табылады. Мұндай қысқарған сөздер бас әріппен жазылады да, қосымша дефис (-) арқылы жалғанады:	У-154-пен ұшып келді
5. Әртүрлі өлшемнің атауы болып табылатын өлшем бірліктері де қысқарған сөздер болып табылады. Бұлар кіші әріппен жазылады да, оларға қосымша дефис (-) арқылы жалғанады:	м (метр), см (сантиметр), кг (килограмм), т (тонна)

Өмірдің екі тірегі:

үйренуден жалықпау,

үйретуден аянбау...

